



REBOLUSYONARYO A DYARYO TI UMILI ITI AMIANAN-LAUD A LUZON

DANGADANG

Espesyal nga Isyu Abril 2004 * Tawen 18 Blg. 3 * P5.00 * Ipása no Mabása

Dagiti kapepeklan a Reaksyonaryo a Kandidato

Nasam-it a Karkari Napait no Agsubli



Iti daytoy nga espesyal nga isyu ti *Dangadang*, amirisen ken ibutaktak tayo dagiti kapepeklan a reaksiyonaryo a politiko.

Politika nabara

Pananggundaway barabara

Biag ti umili di kailala

Iti nagan ni kinabaknang uray ania

Matagikua laeng arwan labas na

Maiyarig iti langis dagiti reaksiyonaryo a politiko, ken danum met dagiti umili. Langis gapu iti galad a nakarimbaw kadagiti umili. Dagiti reaksiyonaryo a politiko ket agnamnam-ay kadagiti natural a kinabaknang ti pagilian, manggungundaway kadagiti umili, sabidong nga in-inut a mangpatpatay kadakuada.

Nalaing nga agpamarang dagiti reaksiyonaryo a politiko nga isport da, ngem iti kaunggan ket agbegbeggang ti pungtot da kadagiti karibal da iti politika. Ginnulangan, sinnikap, sinnaur, pinnardaya, pinnatay ti aramid da. Ti nasam-it nga isem da iti sango ti umili ket pangkalub kadagiti napait a panggep da.

Apektado iti nailian a krisis pang-ekonomya ti interes dagiti agar-ari a dasig. Kumaro ti sistema dagiti warlord. Nakaro ti banggaan

Abra

dagitoy a pamilya dagidi a panawen. Panagiin-nagaw iti puesto tapno agpabaknang babaen iti panagkurakot kadagiti pondo, panangipataker iti nadumaduma a negosyo ken panangpasaknap kadagiti anti-sosyal nga aramid kas iti smuggling, drugs, pagsusugalan kas iti jueteng. Napalalo met a pannakagunggundaway ken panangparigat ti nasagrap ken napadasan ti umili sadiay kas iti panangpapatay, panagpuor kadagiti balbalay ken panangdadael ti pangkabiagan ti umili, panagmasaker, panagkikil iti nadumaduma a wagas.

Sipud impakat dagiti Espanyol ti kolonyal ken pyudal a gobyerno iti Pilipinas, nasanay ken nai-pasagepsep kadagiti apo't daga ken burgesya wenno agar-ari a dasig ti panangkontrol da iti politika, ekonomya, ken militar ti pagilian. Ad-adda a napasingkedan daytoy idi panawen ti managsakup nga Amerikano, ken kadagiti simmaruno a panawen dagiti aso-aso a republika. In-inut met a mapunpunas dagiti nainsigudan a sosyo-politikal a kaugalian dagiti nailian a minor-ya.

*Adun a panawen iti naglabasen
Adun a karkari diak pulos mabilangen
Tarwen 2004 ket eleksyon manen
Tapno ti umili inda manen allilawenen...*

**DANGADANG**

Ti **DANGADANG** ket rebolusyonaryo a dyaryo ti umili iti Amianan-Laud a Luzon. Kas dyaryo ti umili, ditoy a maipablaak dagiti kinapudno a laplappedan ken kalkaluban dagiti agturturay a dasig. Ditoy a maammuan tayo dagiti damag ken impormasyon a saan a rumrummuar kadagiti dyaryo, radyo, ken pagiwarnak a kontrol dagiti managgundaway ken manangidadanes a dasig.

Ti **DANGADANG** ket rummuar kada dua a bulan iti tarabay ti Partido Komunista ti Pilipinas. Tapno naan-anay nga agserbi daytoy kas boses ti umili, dawaten mi nga ipatulod yo dagiti damdamag, komentaryo, kanta, iskit, daniw, drowing, ken dadduma pay a kayat yo a maipablaak. Kasta met a silulukat kami iti aniaman a dillaw, obserbasyon, ken singasing.

Pagtitinnulongan tayo a padur-asen ti **DANGADANG**. Ti lima a piso a presyo ti dyaryo tayo ket bassit a boluntaryo a donasyon tapno masuportaan ti agtultuloy a panagruar na.

Nasaknap ti warlordismo iti Abra. Dagiti politiko ket addaan bukod nga armado a grupo a makipinnatay aglalo no tiempo ti eleksyon. Uray iti barangay ket agraraira ti warlordismo. Nasaknap nga us-usaren dagiti warlord ti ranggas ken kuarta. Gapu iti napalalo a panaggartem para iti politikal a bileg, uray dagiti agkakabagian ket aglaban kas iti banggaan dagiti Bernos iti La Paz, Balao-as iti Boliney, Domes-ag iti Peñarrubia, Pacsa iti San Isidro, ken Seares-Luna iti Lagayan. Masansan a ti panagriribal da ket dumanon iti pinnatay.

Dinastiya a Valera

Sakbay 1986, ti Abra ket pagar-arian ti dinastiya a Barbero (napeklan a loyalista ken kroni ni diktador a Marcos) ken dagiti pasurot da. Kalpasan ti People Power ti 1986, naipuesto kas OIC a gobernador ni Vicente "Vicsyd" Valera. Ditoyen a nagrugi ti dinastiya dagiti Valera iti Abra. Kalpasan a nag-gobernador, nagbalin a konggresman iti tallo a daras, santo nagsubli kas gobernador manen. Ti asawa na a ni Ma. Zita Valera ti agdama a mayor ti Bangued bayat a ti kasinsinna ani Chito Bersamin ket konggresman. Kaaduan kadagiti agdama a mayor ket paspasurot da. Malaksid kadagitoy, adu pay kadagiti kabagian da ti adda iti

**Ni Vicente "Vicsyd" Valera****Ni Chito Bersamin ken Ma. Zita "Ching" Valera**

DANGADANG

nadumaduma a posisyon ti gobyerno. Agsisinnukat da laeng iti puesto tapno agtalinaed iti poder.

Mailed Molina

- Kandidato para iti mayor ti Bucloc.
- Traydor iti rebolusyon. Maysa kadagiti kabunggoy ni Conrado Balweg a nangidaulo iti kontra-rebolusyonaryo nga isplit manipud iti CPP-NPA idi Abril 7, 1986. Intaray da ti nasurok 100 a napipigsa nga armas manipud iti arsenal ti NPA. Imbalsa da ti pondo ken inagaw da ti dadduma pay a rekursu ti rebolusyonaryo a tignayan.

- Aginlalaing ken napangas nga indeklara na ti bukod na a bagi kas *supreme commander* ti paksyon na iti CPLA a terorista ken katutulnogan nga aso-aso ti reaksyonaryo a turay iti Kordilyera, mangsalsalaknib iti interes dagiti kabusor a dasig, ken mangipatpatungpal iti kontra-umili ken kontra-rebolusyon a programa ti reaksyonaryo a gobyerno. Dagiti paborito na a pasurot ket nagbalinen a kameng ti AFP ken CAFGU, numan pay ipilpilit da nga usaren latta ti nagan a CPLA.

- Nangpapatay iti maysa a reporter iti Baguio
- Agpabpabaknang babaen iti maiparit a droga, illegal logging, prostitusyon, panagkurakot, carnapping, jueteng, panaggamgam iti daga iti Baguio, kdp.
- Papaaduen na ti armado a puersa na

Pamilya a Luna

- Ni Roger Luna ket landidato para gobernador. Para iti mayor ti Lagayan ni Cecille Luna nga asawa na. Ti anak da a ni Ryan Luna ket kandidato para iti Sangguniang Bayan. Ti



Ni Roger Luna

manugang da ket para iti bise-mayor.

- Aktibo a supsuportaran da dagiti operasyon militar laban iti rebolusyonaryo a tignayan. Aktibo da nga agkam-kampanya kontra iti NPA. Isuda ti utek iti bogus a panagsurender dagiti minor de edad a pinagparang nga NPA.
- Adun ti pinatay da Luna a kalaban da iti politika, suspetsa da a tumultulong iti rebolusyonaryo a tignayan, ken uray dagiti inosente a sibilyan kas kada Leonardo “Balong” Parado, Ruding Layao, Karas Medrano, kdp.
- Agnegnegosyo da iti ilegal a droga a kakumplot dagiti opisiales ti pulis ti Abra.



Cecile Luna - “Landok a Babai”



Ryan Luna

Baguio City

Mauricio Domogan

- Kandidato para konggresista ti Baguio.
- Maysa a burukrata kapitalista ken tradisyonal a politiko, aso-aso dagiti imperyalista ken dadakkel a komprador burgesya.
- Idi mayor pay, dakkel ti naala na a pasuksok manipud iti Fil-Estate tapno paboran ken palusoten ti saan da a panagbaybayad iti abang ti Camp John Hay. Adda pay dagiti anomalya na iti Uniwide bidding, City Hall renovation, kdp.
- Supsuportaaan na ti panagserrek ti managdadael a kompanya ti minas.
- Kakumplot na ni Bernardo Vergara iti panagdawat



iti pasuksok manipud kadagiti dadakkel a kompanya kas iti Jadewell, SM, panagitakder iti casino iti Baguio, kdpay.

Bernardo Vergara

- Kandidato para mayor iti Syudad ti Baguio.
- Dati nga aso-aso ni Aspiras a Ministro ti Turismo idi panawen ni Marcos. Ditoy a nagpabaknang manipud kadagiti proyekto iti turismo.
- Idi maipuesto isuna iti Philippine Tourism Authority ket impatakder na ti monumento ni Marcos iti Marcos Park a nagbalin a gapu ti panagpapanaw kadagiti nainsigudan nga Ibaloi iti lugar.
- Iti tallo a daras a nagkonggresman lallalo a bimmaknang manipud kadagiti proyekto ti gobyerno ken *pork barrel funds*, kas iti pondo para iti *earthquake rehabilitation* ti Baguio a kinusitan na. Laplappedan ken liplipiten na dagiti umili nga agprotesta.
- Masansan ti demolisyon kadagiti balbalay ti nakurapay iti syudad.
- Nalatak ti sipaparang ken awanan bain a panagkikil na iti pasuksok iti tunggal proyekto.
- Konkontraen na ti pannakawaswas ti napnuan-anomalya a kontrata ti Jadewell, maysa a korporasyon nga agsingsingir ti *parking fee* kadagiti lugan.



Benguet (Mankayan)

Materno Luspian

- Agdama a mayor ti Mankayan ken tumartaray manen kas mayor
- Aso-aso ti Lepanto, dati nga abogado ti Lepanto, pinataray ti Lepanto tapno matengngel ti kompanya ti lokal a gobyerno. Depdependaran na ti Lepanto ken ip-ipiten na dagiti umili ken organisasyon masa.
- Kontra-mangmangged ken mannalon. Naki-

kumplot iti LCMC tapno buraken ti welga dagiti mangmangged.

- Nagmaniobra tapno makaluban dagiti problema ti mannalon kas iti makaperdi a panagminas ti Lepanto. Imbelleng na dagiti nagadu a petisyon ken resolusyon ti umili nga insubmitar da kenkuana.
- Aktibo a sumupsuporta iti militarisasyon ti Mankayan
- Kurakot

James Guanso

- kandidato iti vice-mayor, kapartner ni Luspian
- nagpada da iti takder kenni Luspian
- naasideg ken addaan silpo iti militar

Ilocos Norte

Ti politikal a bileg iti Ilocos Norte ket monopolyo



Ni Bongbong Marcos

dagiti Marcos. Awan ti kalaban ni Bongbong Marcos a tumaray kas gobernador. Ni Imee Marcos ket tumaray met kas congresswoman iti 2nd district. Segun iti damag, dagiti makurakot ni Imee

a pondo ti gobyerno ket mairuar ditoy Pilipinas babaen iti kabit wenno kamalala na a Singaporean. Iti napalabas, adu met laeng ti nairuar ken impuonan da iti negosyo idia Guangzhou ken Guandong, China babaen iti immuna a kabit na nga opisyal idia.

Adu dagiti kasinsin da Bongbong ken Imee a tumaray iti Sangguniang Panlalawigan: ni Michael Keon iti 1st district, Nonoy Marcos ken Angelo Barba iti 2nd district. Kasta met ti dadduma pay a kabagian a iti nadumaduma a posisyon. Ti panagtalinaed ken petpet iti turay dagiti Marcos iti probinsya ket gapu iti kinakapsut pay laeng ti rebolusyonaryo a tignayan iti probinsya ken ti relatibo nga atrasado pay a kapanunutan dagiti umili iti probinsya, maibilang ti napigsa pay laeng nga impluwensya ti rehiyonalismo, ken panagusar ti bileg a pang-

DANGADANG

ekonomiya ken pampulitika a naurnong manipud iti panawen ti diktadura.

Iti kastoy a kasasaad, makita a nakatrensera ti pamilya Marcos iti Ilocos Norte, malaksid iti Laoag City a sentro ti negosyo a pagar-arian ti dinastiya a Fariñas. Manipud pay 1980, agsisinnublat dagiti Fariñas a nagtutay iti Laoag City. Nabayag a nagmayor ni Rudy Fariñas, napeklan a reaksyonaryo ken kontra-rebolusyonaryo. Simmublat ni manong na a Roger Fariñas a nagmayor iti tallo a daras. Agkandidato ita kas mayor ni Michael Fariñas a kaanakan da. Ditoy a posible a nabara ti umay nga eleksyon. Panggep dagiti Marcos nga ited ti todo-suporta kenni Alice Ventura a kalaban ni Fariñas.



Ni Rudy Fariñas

Ilocos Sur

Bumarbara ti laban dagiti tallo a kandidato iti gobernador iti Ilocos Sur a da Luis “Chavit” Singson, Estelita Cordero, ken Efren “Rambo” Rafanan.

Ni Cordero ket chairperson ti *Save Ilocos Sur Alliance* (SISA), maysa nga alyansa dagiti nadumaduma a kontra-rebolusyonaryo a politiko

ken repormista a grupo iti Ilocos Sur, maibilang ti *Alab Katipunan, Akbayan*, kdpy. Konektado ti SISA iti terorista a *Revolutionary Proletarian Army-Alex Boncayao Brigade* (RPA-ABB).

Ni Rafanan ti maysa kadagiti nangibangon iti *Citizens Information Action* (CIA), organisasyon nga



Ni Efren Rafanan

us-usaren na a pagalaan iti pondo manipud kadagiti Ilokano ditoy Pilipinas ken abrod. Ti dadduma a kameng daytoy ket agserserbi kas espiya ken gayd kadagiti operasyon militar a mangisaksaknap iti ranggas ken panangallillaw kadagiti umili ti Ilocos Sur. Idi pay 1980s, imbangon ni Rafanan ti relihiyoso a kulto a *College of Mysteries*. Dagiti maallilaw a rekrut ditoy ket suroan na a mangdiyos kenni Ferdinand “Bongbong” Marcos Jr.

Benjamin Maggay

- agdama ken agtaray manen a mayor ti Cervantes, Ilocos Sur.
- napeklan nga aso-aso ti Lepanto
- kurakot, kumontra iti panagorganisa ken panagtignay ti umili
- kontra-rebolusyonaryo

George Sanchez

- kandidato para mayor ti Cervantes
- maysa nga apo’t daga
- lokal a kontraktor nga asideg iti Lepanto
- naasideg ken addaan silpo iti militar

Jaime Asyong

- agdama ken agtaray manen a mayor ti Quirino, Ilocos Sur
- napeklan nga aso-aso ti Lepanto
- kurakot, kumontra iti panagorganisa ken panagtignay ti umili
- kontra-rebolusyonaryo

Kalinga

Dominador Belac


- Reserved Officer (Major) ti AFP. Kandidato para iti gobernador.
- Tallo a daras a nagmayor iti Pinukpuk (1988-1995). Addaan ti adu a badigard a mangisaksaknap ti terorismo.
- Minilyon ti kinurakot na a kuarta ti umili isu a manmano ti naimplementar a proyekto. Addaan kaso iti panaggamgam iti daga babaen iti armado a bunggoy na.
- Karanggasan iti amin a nagbalin a mayor iti Kalinga. Binugbog ken inkulong na ti maysa a

barangay kapitan, ken inhold ken imbilag na pay iti init dagiti umili ti Pinukpuk a mapan koma iti maysa a rali idia Tabuk idi Pebrero 23, 1990.

- Sinuportaran na ti naranggas ken napaut nga operasyon ti militar (1990-1994) iti panangidaulo ni Lt. Col. Leno Gamonnac ti 45th IB a nangisayangkat iti panagbomba, istraping, shelling, ken dadduma pay a ranggas kadagiti umili.
- Pilit a pinag-CAFGU na dagiti umili iti kada baryo. Sinnoman nga agmadi ket dukoten da iti rabii ken butbutengen.
- Pinatay dagiti goons na ni Ayangwa Claver, anak ni dati a konggresman William Claver, idi Enero 21, 1990.
- Suspek a nangpapatay kenni Peter Dangiwan, kandidato a bise mayor ken miembro ti Bayan Muna, idi Abril 2001.
- Pinaltogan na ti badigard na a taga-Wagod.
- Napalalo a ranggas ken panagsaur ti inusar na tapno mangabak kas gobernador iti eleksyon idi 1998.
- Idi nagbalin a gobernador ti Kalinga idi 1998-2001, adu ti kinurakot na a pondo ti gobyerno. Inusar na ti pondo a gimatang iti Nissan Safari nga agbalar ti P1.2 milyon. Gapu ditoy, nakasoan, nasuspinde iti innem a bulan.
- Idi Oktubre 4, 2000, winaswas ti COMELEC ti panangabak na kas gobernador.
- Adda ti utang na a biag ken dara iti masa ken iti rebolusyonaryo a tignayan.

Lt. Col. Leno Gamonnac

- Kandidato para iti Sangguniang Panlalawigan.
- Retired Lt. Col. ti AFP. Kabilang met laeng iti CPLA-Conrado Balweg pak-syon.



• Isuna ti Batalyon Komander ti 45th IB idi panawen ti naranggas nga operasyon militar da iti Pinukpuk ken Balbalan idi 1990-1994. Adu a masa ti pinabutangan ken pinarigatan na gapu iti

panagbomba, istraping, kdp.

- Inusar na ti ranggas ken pammutbuteng tapno piliten ti umili nga ag-CAFGU.
- Adda inagaw na a daga ti umili iti Apatan, Pinukpuk.
- Idi nagtrabaho iti TESDA (Technical Education and Skills Development Authority), kinurakot na ti pondo a para koma kadagiti iskuelaan.

Arthur Abbacan

- Kandidato para iti Sangguniang Panlalawigan.
- Nabayag a kameng ti Military Intelligence Group (MIG). Dakkel ti pinapel na kadagiti operasyon militar manipud idi 1990. Kadagitoy nga operasyon, adu nga umili ti pinarigatan ken rinanggasan dagiti militar.
- Aktibo iti kampanya a panagpasurrender iti NPA.
- Kumontra kadagiti progresibo nga organisasyon ti umili.
- Inusar na ti posisyon na iti Sangguniang Panlalawigan manipud 2001 tapno ipasaknap ti repormismo ken allilawen ti umili babaen kadagiti bogus a kari ti North East Luzon Foundation, Inc.

Allen Jessie "Sonny" Mangaoang

- Unopposed a kandidato para mayor ti Balbalan. Nupay siguradon ti panangabak na, umad-adu dagiti umili nga agpanggep a mangipagna iti "objection votes" laban kenkuana. Ti "objection vote" ket isu ti saan a panangisurat dagiti botante iti nagan ni Mangaoang iti balota. Iti kasta, maipakita a saanen a kayat ti umili nga agtultuloy ti panagmayor na iti Balbalan.
- Supsuportaan na ti panagserrek dagiti ganggannaet a kapitalista tapno agminas. Manipud pay nag-Vice Mayor ti Balbalan idi 1998-2001, kayat na a sumrek ti Newmont Incorporated tapno agminas iti Balbalan.
- Maysa a korap a mayor (2001-2003). Kakumplot na ni Gov. Duguiang iti panagideklara iti maysa a pribado a fishpond idia Tabuk kas maysa a proyekto ti gobyerno. Ti P200,000 a pondo para iti *fishpond* ket nagbibingayan da- P100,000 ti imbalsa ni Duguiang, P60,000

kenni Mangaoang, ken P40,000 iti akinkukua ti fishpond. Iti P5 milyon a pondo para iti widening ti Kalinga-Abra national road, agarup P2 milyon laeng ti nausar. Ti dadduma ket imbalsa na. Inagaw na ti trabaho ti General Service Officer a gumatang kadagiti kasapulan ti munisipyo. Iti kastoy, makakurakot babaen iti sobra a panagpresyo kadagiti magatang kas iti lugan a no sadino nga agarup P300,000 ti naala na. Sabali pay ti naala na iti nadumaduma a materyales para iti konstruksyon, kdp. Ususaren na ti nagan ti kabsat na tapno ilimed nga isuna ti kontraktor kadagiti proyekto ti gobyerno kas iti panangipatakder kadagiti iskuelaan ken konstruksyon ti kalsada.

- Makikumkumplot kadagiti militar kontra iti rebolusyonaryo a tignayan. Supsuportaan na ti panagtalinaed ti militar ken CAGFU kadagiti baryo ti Balbalan. Idurduron na pay iti *Provincial Peace and Order Council* (PPOC) a paaduen ti militar, CAGFU, ken detatsment tapno kano “mapatalaw ti NPA iti Balbalan.” Nalatak ti silpo ni Mangaoang iti militar, nangruna iti 21st IB a pasaray ikkan na ti kuarta kas regalo. Nakita ti masa ti panangited ni Mangaoang ti P100,000 kas sagut na iti militar idi 2001 eleksyon. Dagiti met badigard ni Mangaoang ket lumpen a nakasilpo kadagiti reaksyonaryo nga Army.
- Suspek isuna a timmulong iti pasista a bunggoy da Belac-Tega-Baliling iti panangpatay kenni Peter Dangiwan, kandidato para Vice-Mayor

ken miembro ti *Bayan Muna*, idi April 2001. Ilemlemeng na dagiti nangpatay kenni Dangiwan. Ni Mangaoang ti nangiparuar iti baludan iti maysa kadagiti naaresto a suspek a nangpatay kenni Dangiwan.

Efraim Orodio

- Kandidato para iti Sangguniang Panlalawigan
- Dati a mayor ti Rizal. Kurakot. Nalawa ti inagaw na a daga iti Rizal.
- Maysa a Reserved Officer (Major) ti AFP.

Cosme Gunnawa Sr.

- Kandidato para iti Sangguniang Panlalawigan
- Utek kadagiti organisado a sindikato ti panagtakaw iti Tabuk.

Leonardo Bun-as

- Kandidato para iti Sangguniang Panlalawigan.
- Agdama nga hepe a komander ti kontra-rebolusyonaryo a CPLA-Balweg paksyon iti Kalinga

Irving Dasayon

- Kandidato para iti mayor ti Pinukpuk
- Adu ti inagaw na a dagdaga dagiti umili ti Apatan, Pinukpuk manipud pay 1970s inggana 1987. Alaen na ti kagudua ti apit dagiti mannalon a makitalalon kadagitoy.
- Bugbogen, pabutngan, ken tutokan na iti paltog dagiti umili a saan a sumurot iti kayat na.

- Idi administrative officer isuna ti DECS, adu a pondo ti kinurakot na. Kikilan na dagiti aplikante a titser.

Jocel Baac

- Kandidato para Mayor ti Tabuk.
- Addan ti pribado nga armado a grupo.
- Nakasoan ken naibalud gapu iti panagdangran na iti maysa a kahera ti restawran idia Tabuk idi 1999.
- Nagakem kas gobernador idi nasuspende ni Belac.



Rodolfo "Rudy" Balutoc

- Kandidato para Sangguniang Bayan ti Balbalan
- Nabayag a miembro ti Military Intelligence Group. Idi 1980s, napinget isuna a mangsisiim iti panagtignay dagiti mangmangged, estudyante, ken nakurapay iti syudad ti Baguio a lumablabaan iti Chico dam ken diktadura nga US-Marcos.
- Idi nagbalin a barangay kapitan ti Buaya, Balbalan, kinurakot na ti pondo ti barangay. Inusar na ti pondo para iti armado a bunggoy na.
- Pinagbakwit na dagiti umili ti Buaya idi umuna a lawas ti Marso 2004. Adu nga umili ti naparigatan gapu iti daytoy nga aramid na.

La Union**Pamilya Ortega**

- Maysa gasut a tawenen ti dinastiya a politikal ti pamilya Ortega nga agturturay iti La Union. Napeklan a burukrata kapitalista ni Manuel Ortega.
- Agkaribal da Victor Ortega ken Butch Dumpit (anak ni Tomas Dumpit) kas kandidato para gobernador.

**Ni Victor Ortega****Tomas Dumpit**

- agdama a konggresman ken tumartaray manen kas konggresman iti 2nd district ti La Union.
- Retirado nga heneral ti AFP.
- Maysa kadagiti hatchetman (mammamatay) nga ibabaon ni Marcos idi panawen ti *martial law*.
- Karnaper ken dealer ti marijuana.
- Napeklan a burukrata kapitalista.

Mountain Province

Ti pannakaabak ni Victor Dominguez idi 2001 eleksyon ket nangted patured pakinakem kadagiti dadduma a politiko tapno agambisyon a mangkalaban kenkuana itatta. Ngem segun iti maysa a lakay, "Buaya amin dagitoy a politiko nga agam-ambisyon nga agkonggresman. Ti pagdudumaan da laeng ket adda nabnabsog a buaya, adda met dagitoy mabisbisinan unay." Iti umay a reaksyonaryo nga eleksyon, adu a politiko ti agkandidato: lima iti posisyon a konggresman, uppat para gobernador, dua iti bise gobernador, ken adu a para bokal.

Victor Dominguez

- Kandidato para konggresman
- Naggapu iti dasig a nailian a burgesya. Ti pamilya Dominguez ket taga Sabangan, MP.
- Maibilang a dinastiya ti panagturay dagiti Dominguez iti burges-reaksyonaryo a politika ti Mountain Province iti nabayag a panawen. Nagturay kas gobernador, assemblyman, ken konggresman. Simmublat ti asawa na a naggobernador idi nag-konggresman isuna.
- Agingga ita ket napigsa pay laeng ti impluwensya na iti lokal a gobyerno numan pay saanen a nakatugaw. Tao ni Dominguez dagiti kangrunaan nga adda iti DPWH ken dadduma pay nga ahensya.

David Daoas

Kandidato para Konggresman. Taga-Sagada, maysa a burukrata kapitalista. Nagbalin a chairperson ti National Commission on Indigenous People (NCIP), ahensya ti reaksyonaryo a gobyerno a mangal-allilaw ken manggungundaway kadagiti nailian a minority.

Basar kadagiti report ti nadumaduma nga umili, ti panagakem ni David Daoas kas Chairperson ti NCIP ket napnuan anomalya ken panagkurakot a pakaibilangan dagiti sumaganad:

- Nangibulsa iti P36 milyon a pondo para kadagiti iskolar a nailian a minority.
- Utek iti pannakaaramid ti bogus a *Free Prior Informed Consent* (FPIC) wenno pammalubos dagiti umili ti Sunnyside, Tadian, Mountain

DANGADANG

Province, ken Bedbed, Buguias, Benguet a sumrek ti panagminas ti Lepanto Consolidated Mining Corporation sadiay. Uray dagiti FTAA iti dadduma pay a probinsya ti Kordilyera ket inyaramidan na ti FPIC.




Ni David "Annab" Daoas

- Nagaramid iti 1,982 a bogus a titulo ti ansestral a daga iti Baguio, Benguet, ken Mindanao. Dagiti inyaramidan na iti bogus a titulo ket singiran na ti 10% ti balor ti daga wenno nasursurok pay kas pasuksok. Dakdakes pay, dagitoy a titulo ket ilaklako ni Daoas babaen kenni Sonia Daoas nga asawa na ken ti asawa ni Konggresman Domogan kadagiti baknang nga Igorot idiaiy US ken dadduma pay a pagilian. Gapu ditoy, bimmaknang ni Daoas. Adu ti dagdaga na ken addaan pay iti resort idiaiy Palawan. Daytoy nga aramid na ket imbutaktak ni Atty. Castillo Tidang, Jr. a dati a kadua na a *commissioner* ti NCIP. Gapu ditoy saan a bigbigen ti reaksyonaryo a gobyerno dagitoy a titulo. Ngem dagiti biktima na ket nalpas metten a napukawan iti daga, napukawan da pay iti kuarta.

Roy Pilando

- Kandidato para konggresman
- Maysa a burukrata kapitalista.
- Agdama a konggresman ti Mountain Province no sadino nga awan ti uray maysa a linteg a pagimbagan koma ti umili ti naaramid na iti konggreso.
- Manmano la ngaruden ti proyekto nga impatungpal na, nagkurakutan na pay, kas iti waterworks para iti Bontoc. Naingpis unay dagiti tubo a ginatang ni Pilando. Gapu ditoy ket



nagrekلامo dagiti umili. Nabayag a nagsardeng ti proyekto.

- Agrekلامo met dagiti engineer ti DPWH gapu iti nalabes a pannakibiang na iti *bidding* dagiti proyekto.
- Napalalo a nauma dagiti umili kenkuana.

Gabino Ganggangan

- Kandidato a mayor ti Sadanga
- Maysa kadagiti lider ti aguuyong a CPLA-CBAd-Balweg paksyon. Naglaklak-am manipud iti nakurakot ti CPLA-CBAd manipud iti gobyerno.
- Napeklan a kontra-rebolusyonaryo, kanayon nga agiruar kadagiti kontra-NPA a pablaak ken pammadakes iti rebolusyonaryo a tignayan.
- Maysa kadagiti utek ken paltog na ti nausar iti pannakatay da Robert Estimada, ken Ferdinand Bragas idi 1988. Da Estimada ken Bragas ket agpada nga staff ti *Development Agency of Tribes in the Cordillera*.

Kongklusyon

*Diakon masbaalan ti adu a rigrigat
Diakon maibaturan ti adu a kinadamsak
Tumakder 'tay ngarud irupir ken idur-as
Cubal ti umili ti solusyon ti panagrigrigat*

Ti kumarkaro a krisis pang-ekonomya ken pampolitika ket nadam-eg a daga para iti panag-abante ti rebolusyonaryo a tignayan.

Iti panagkaro ti krisis, ad-adda met a maiduron ken pumigpigsa ti pangngeddeng ti umili a lumaban. Saan dan a maibaturan ti kinabulok ti agdama a sistema ti gobyerno. Ken uray iti intar mismo dagiti agar-ari a dasig wenno reaksyonaryo a gobyerno ket adda dagiti bumangir iti rebolusyon.

Ti krisis iti pagilian ket kas iti nadawel a baybay no sadino a dagiti napeklan nga agar-ari a dasig ket malmalmes ken desperado nga agdidinnuron ken agririnnarem, bayat a ti rebolusyonaryo a tignayan ti umili ket kas kadagiti dadakkel a dalluyon a manglemmes ken mangalun-on kadakuada. 📌

Dagiti kapeklan a reaksyonaryo a kandidato para senador

Awan magun-od a batayan a panagbalbaliw ti gimong a Pilipino babaen iti eleksyon. Uray ti rupa ken nagan ti kaaduan dagiti kandidato a para senador iti umay nga eleksyon ket awan pay panagbalbaliw na. Ti nagbaliw laeng ket ti bunggoy a pakaibilangan da itatta. Awan sarday dagiti panagsisinnukat dagitoy a reaksyonaryo a politiko iti partido, tumayab nga agalis-alis iti kampo. Gapu ta awan dakkel a nagdumaan dagiti programa dagiti nadumaduma a partido, saan a programa ti importante kadakuada no di ket ti maipuesto iti gobyerno tapno makalak-am iti benepisyo babaen iti panagkurakot.

Kas pangarigan, dagiti dati nga oposisyon a da Miriam Defensor Santiago, Orly Mercado, Rodolfo Biazon, ken John Osmeña, ket kameng ita ti K4 koalision ni Gloria Macapagal Arroyo. Da Alfredo Lim ken Ernesto Herrera met a dati a kameng ti bunggoy ni GMA ket adda iti kampo ni Fernando Poe Jr. itatta. No saanen nga umobra ti *“kudkodek ta bukot mo ta kudkodek met ti bukot ko”* a prinsipyo dagiti agkakabunggoy, bumallasiw dan iti sabali a bunggoy a makikinnudkod!



Pannakabunggoy-bunggoy dagiti kandidato

	K4	KNP	Alyanya ng Pag-asa	Dadduma pay
Dagiti napeklan a reaksyonaryo	Miriam Defensor Santiago Rodolfo Biazon Orlando Mercado Robert Barbers	Juan Ponce Enrile Ernesto Maceda Alfredo Lim Ernesto Herrera Jose "Jingoy" Estrada		Francisco Tatad- PMP
Burukrata Kapitalista	John Osmeña Robert Jaworski Richard Gordon Mar Roxas Parouk Hussin	Aquilino Pimentel Didagen Dilangalen		Carlos Padilla-Independent Heherzon Alvarez- Independent
Burges repormista	Ramon "Bong" Revilla, Jr. Manuel "Lito" Lapid Pia Cayetano	Reynaldo Bagatsing Salvador Escudero, Sr. Jamby Madrigal Boots Anson Roa Amina Rasul	Jay Zonza Frank Chavez Perfecto Yasay, Jr. Bong Coa Melanio Mauricio Nicanor Gatmaitan, Jr. Eduardo Joson	Eddie Ilarde-Independent Alvincent Almirate- KBL

Juan Ponce Enrile

- Dakkel a komprador-apo't daga
- Nakapaggamgam iti dadakkel a parsela ti daga iti Cagayan ken dadduma pay a paset ti Pilipinas, makinkukua ti JAKA Industries, addaan sosyo iti Philippine National Bank, United Coconut Planters Bank, kdp.
- naranggas a pasista a ramay ti dikdatura a Marcos idi no sadino a nagakem kas sekretaryo/ministro ti National Defense, ken indauluan na ti adu a panaglabsing kadagiti pangtao a karbengan, panangidadanes iti umili, ken dadduma pay a krimen
- Naglak-am iti adu ken dadakkel a benepisyo idi panawen ti Martial Law
- Maysa kadagiti 11 senador a maka-Estrada idi *impeachment trial*.

Ernesto Maceda

- Dati met laeng a paset ken natulnog a pasurot ni Marcos.
- Nagakem iti nadumaduma a posisyon iti rehimen a US-Aquino.
- Maysa kadagiti senador a nangdependa iti panagtalinaed ti Base Militar ti Pilipinas

Rodolfo Biazon

- Dati nga heneral ti AFP ken agdama a senador
- Napeklan a kontra-rebolusyonaryo, mangidurduron iti kontra-umili nga *Anti-Terrorism Bill*.
- Maysa kadagiti mangkonkontra iti saritaan iti kappia iti baet ti reaksyonaryo a gobyerno ken rebolusyonaryo a tignayan.

Orlando Mercado

- Dati a sekretaryo ti National Defense idi panawen ni Estrada
- Inwayat da kenni Estrada ti todo-gera kontra iti rebolusyonaryo a tignayan ken iti MILF
- Mangidurduron iti *Anti-Terrorism Bill*.

Miriam Defensor Santiago

- Maysa a nalabid ken maaw-awagan iti “bagtit”
- Napeklan a maka-Erap idi panawen ti *impeachment*. Bigla laengen a limmagto iti kampo ni Arroyo iti daytoy nga eleksyon, pakakitaan iti nakaro a kina-opportunista na.

Afredo Lim

- Maysa a napeklan a pasista. Dati a kameng ti Philippine Constabulary idi panawen ti diktadura a Marcos. Natulnog a tao ni Fidel Ramos.
- Napeklan a manglablabsing iti karbengan kas tao. Idi nagmayor iti Manila, asak-asaken ken dalapusen na dagiti pangtao a karbengan kampanya na ti iligal a droga.

Robert Barbers, Sr.

- Napeklan a burukrata kapitalista ken pasista.
- Dati nga heneral ti PNP.
- Nainget a mangidurduron iti *Anti-Terrorism Bill*.

Jose “Jinggoy” Estrada

- Anak ni napatakyas a presidente Joseph Estrada
- Naibalud kagiddan ni ama na gapu iti napalalo a panagkurakot
- Kadua na ni ina na a nagkurakot iti P430 milyon a pondo manipud iti PCSO idi presidente ni Estrada.
- Dati a mayor ti San Juan ken mangpatpataray iti jueteng kadagiti syudad iti Metro Manila
- Nangkolkolekta iti kuarta a bingay ni Erap iti pasuksok dagiti jueteng lord.

Francisco Tatad

- Napeklan a burukrata kapitalista.
- Dati a pasurot ken propagandista ti diktadura a Marcos
- Maysa kadagiti 11 Senador a maka-Erap idi *impeachment trial*.

Ernesto Herrera

- Napeklan a burukrata kapitalista.
- Agpampamarang a maka-mangmangged ngem ti agpayso ket napeklan a kontra-umili
- Isu ti nangisurat iti RA 6715 ti 1989 wenno maaw-awagan nga *Herrera Law* a mangliplipit iti karbengan dagiti mangmangged nga agwelga.



PANNIRIGAN

NI SIMON "KA FILIW" NAOGSAN



Burges nga Eleksyon Manen

Segun kadagiti agturturay, ti eleksyon ket pakakitaan nga adda wayawaya ken demokrasya ditoy Pilipinas. Babaen kano iti eleksyon, adda gundaway ti umili nga agpili ken mangsukat iti kayat da nga agtugaw iti poder. Babaen kano iti eleksyon, mabalin a maipuesto ti tao a mangrisut iti nakaro a problema ti umili ken grabe a korapsyon ti gobyerno.

Iti aktwal, ti eleksyon iti Pilipinas ket saan a nawaya ken demokratiko. Apay?

Umuna unay, gapu ta awan ti demokrasya ken panagpapatas iti ekonomya. Kayat na a saoen, adda dagiti babaknang a manggungundaway ken mangidaddadanes kadagiti marigrigat. Agingga nga awan ti demokrasya ken panagpapatas iti ekonomya, awan met ti pudno a demokrasya ken panagpapatas iti politika. Dagiti tattao iti Pilipinas ket nadasig-dasig. Kaaduan wenno 99% ket marigrigat, kabilang dagiti mangmanged, mannalon, mala-mangmanged, petiburgesya, ken nailian a negosyante. Ti met nakabassit a maysa porsyento laeng ti populasyon ket babaknang a manangidadanes ken managgundaway – dagiti komprador kapitalista ken apo't daga.

Maikadua, dagiti pagpilian a partido ken kandidato ket naggapu wenno kontrolado dagitoy a komprador kapitalista ken apo't daga, a kontrol met ti amo da nga imperyalista nga Amerikano. Manipud pay damo a nasyonal nga eleksyon, amin a nagpresidente idi, awan labas na, ken kaaduan kadagiti senador ken konggresman ket pasig a naggapu ken mangibagbagi iti babaknang a dasig.

Maikatlo, nabayagen a kada eleksyon ket

maikarkari a mabaliwan ti bulok a gobyerno. Ngem kada malpas ti eleksyon, agtaltalinaed latta ken kumarkaro pay ketdi ti marigrigat a kasasaad ti umili, gapu ta uray agsukat-sukat ti nakatugaw iti poder, isu latta a bulok ti sistema.

Maikapat, ti galad ti burges nga eleksyon ket nagulo, narugit, naranggas, ken nagastos. Tapno maisigurado a mangabak ken agtaltalinaed iti poder, agaramat dagiti tuso a tradisyonal a politiko kadagiti makinarya ken instrumento ti ranggas ken panangallilaw. Kangrunaan latta a mapanggeddeng dagiti makunkuna a 4Gs (*Guns, Goons, Gold, ken Gimmick*) a mangiturong ken mangidiktat iti resulta ti eleksyon. Pondo ken popularidad, saan a plataporma wenno programa, ti kangrunaan a pangawis dagiti "trapo" wenno tradisyonal a politiko.

Ngarud, nalawag a ti eleksyon ket ay-ayam laeng dagiti babaknang, panagpammarang da a magmagna ti demokrasya, ken pangliwiwa da kadagiti umili. Ti eleksyon ket maysa a pamuspusan tapno agtaltalinaed da iti poder ken agtultuloy ti panaggundaway ken panangidadanes da iti umili. Ti eleksyon ket "demokrasya" para kadagiti agturturay a dasig, ngem panangallilaw para kadagiti umili.

Numan pay ti eleksyon ket nasagpawan iti sumagmamano a baro a nagan ken agdadamo a sumrek iti politika, dagiti amin a puesto manipud konggresman inggana mayor ket dominado latta dagiti dati ken estabilisado a nagan iti politika - pasado nga agkandidato manen, agdama a nakatugaw iti poder, dagiti kapamilya da, wenno

DANGADANG

dati a kabunggoy da. Iti labanan no sadino a nangnangruna ti kuarta ken popularidad, maiyaw-awan ken maipit dagiti babassit ken saan a nalatak a nagan. Kaaduan kadagiti kandidato iti nababa a tukad ket mapilitan wenno boluntaryo a pumauneg kas paspasurot dagiti adda iti ngato tapno maaddaan tsansa a mangabak.

Iti tiempo ti panagkakampanya, kadawyan ti panagpammarang dagiti reaksyonaryo a kandidato, nakaisem a makilamano. Matokar amin a gimik a pangawis iti atensyon ken botos. Panawen ti “waras” – libre a mainum, makan, pasahe iti lugan, ken dadduma pay a porma ti pasuksok. Panawen ti adu a karkari. Panawen ti panagpipinnadakes ken panagsisinniko.

Kalpasan ti amin, awan ti pudno a panagbalbaliw iti agrigrigat nga umili. Masukatan man ti tao nga adda iti poder, saan met a masukatan ti bulok a sistema! Agsisinnukat laeng dagiti bunggoy ti agar-ari a dasig iti puesto. Ti gastos dagiti kandidato iti eleksyon ket nalaka laeng a bawien da babaen iti korapsyon apaman a makapuesto da iti poder. Dagiti karkari ket tallikudan da.

Ti Rebolusyonaryo a Gobyerno

Kadagiti nasurok 128 larangan a gerilya iti kaaw-awayan ti intero a pagilian, nadumaduma a tukad ti nadanon ti pannakaitakder ken panagandar ti rebolusyonaryo a gobyerno ti umili. Iti tukad ti barangay, adda dagiti grupo wenno komite a pang-organisa iti baryo (GPB wenno KPB) nga agan-andar kas organo ti demokratiko a bileg pampolitika. Dagitoy ket bini ti rebolusyonaryo a gobyerno no sadino a masursurot ti demokratiko a panangidaulo, panagdesisyon, ken panangipatungpal kadagiti programa a pangmasa. Kadagitoy nga organo, maisigsigurado ti representasyon dagiti nadumaduma a sektor – dagiti nababa a saray ti mannalon, dagiti akintengnga a sektor, ken ti Partido ti dasig a proletaryado.

Paset ti programa ti rebolusyonaryo a gobyerno ket ti panangipatungpal iti rebolusyonaryo a reporma iti daga ken panangpadur-as iti ekonomya,

panangibangonkadagitikooperatiba, panangpalawa ken panangpatibker kadagiti rebolusyonaryo nga organisasyon masa, panangited iti edukasyon, serbisyo a pangsalun-at, bukod a depensa ti umili, hustisya, ken dadduma pay.


Kadagiti natibker a rebolusyonaryo a base, dagiti rebolusyonaryo nga opisyal ket ibutos ti umili babaen iti pudpudno a demokratiko a proseso. Kadagiti dadduma a lugar, nalimed a mapili dagiti opisyal tapno saan a maammuan ti kabusor. Awan ti sueldo dagitoy nga opisyal. Pudno a panagserbi iti umili ti gandat da, saan a panagpabaknang ken panagkurakot.

Numan pay agrusrusing ken limitado pay laeng ti kabaelan ti rebolusyonaryo a gobyerno, ipakpakat na ti amin a kabaelan na a mangsungbat kadagiti kasapulan ti umili.

Maipapan iti PTC

Tapno makaandar ti rebolusyonaryo a gobyerno ti umili, kasapulan na ti pondo. Maysa a wagas tapno makaurnong iti pondo ket babaen iti panagkolekta iti rebolusyonaryo a buwis. Maibilang ditoy ti panagsingir iti PTC (permit to campaign) manipud kadagiti kandidato nga umay agkampanya kadagiti kaaw-awayan, aglalo kadagiti lugar a napigsa ti rebolusyonaryo a tignayan ti umili ken NPA.

Ti NPA ti dinutokan ti rebolusyonaryo a



gobyerno ti umili nga agkolekta iti buwis a PTC. Dagiti maurnong a pondo ken materyales ket mausar para kadagiti sumaganad: rebolusyonaryo a trabaho a pangmasa kas iti materyales para iti innadal ti masa, programa iti literasi, medikal ken dental a serbisyo, proyekto iti agraryo a rebolusyon, pangkultural a panagpadur-as, kdp. Ti dadduma a paset ti pondo ket mausar para kadagiti kasapulan ti hukbo ti umili kas iti armas ken bala, treyning politiko-militar, treyning medikal, treyning iti edukasyon ken kultura, komunikasyon ken suplay a pang-opisina, kdp.

Karbengan ti NPA a mangsalaknib kadagiti umili laban iti panangallilaw, pammutbuteng, ken ranggas dagiti reaksyonaryo a kandidato, kasta met dagiti abuso dagiti kameng ti AFP, PNP, CAFGU, CPLA, ken pribado nga armado. Saan a mapalubosan a sumrek dagiti kandidato a saan nga agbayad iti PTC, kasta met dagiti napeklan a reaksyonaryo, kadagiti erya a sakup ti NPA ken rebolusyonaryo a gobyerno ti umili.

Sagpaminsan laeng ti eleksyon, isu a ti makolekta a buwis a PTC ket saan nga umanay a mangsungbat kadagiti umad-adu a kasapulan ti rebolusyonaryo a gobyerno ti umili. Gapu ditoy, ti kangrunaan latta a paggapuan ti pondo na ket nakasanggir ti sipupuso a tulong ti naruay a masa, donasyon dagiti makaawat ken tumultulong nga alyado ken gayyem ti rebolusyon, solisitasyon, nadumaduma a programa dagiti rebolusyonaryo a puerisa iti panagpataud iti pondo, ken dadduma pay a wagas.

Rebbengen ti CPDF

Rebbengen ti Cordillera Peoples' Democratic Front (CPDF) a mangkarit kadagiti kandidato nga ilawlawag ti takder da maipanggep kadagiti isyu ti umili, partikular iti pananglabsing ti

gobyerno kadagiti karbengan ti nailian a minority a makita kadagiti sumaganad a lima a manipestasyon wenno



pakakitaan iti nailian a panangidadanes:

- Panaggamgam iti ansestral a daga babaen kadagiti kontra-umili a linteg ken makadadael nga imperyalista a dam, minas, ken dadduma pay a proyekto;
- Saan a panangbigbig ti gobyerno kadagiti nainsigudan a sosyo-politikal nga institusyon;
- Panangbastos ken komersyaslisasyon iti nainsigudan a kultura;
- Institusyonalisado a diskriminasyon wenno pananglais; ken
- Historikal a panagbaybay-a ken panangipaidam kadagiti serbisyo sosyal kas iti edukasyon, salun-at, agrikultura, kalsada, kdp.

Ti kinagrabe ti nailian a panangidadanes ket dumandanon iti tukad ti makunkuna nga etnosidyo, wenno ti panangperdi iti daga, biag, rekursu, ken mismo nga identidad wenno katatao dagiti umili kas nainsigudan a komunidad, babaen iti nakaro a militarisasyon ken managraut a “panagdur-as.”

Iti Kordilyera, rumbeng a saludsoden tayo dagiti kandidato no ania ti takder da maipanggep kadagitoy a problema. Iti kasta, maamiris ken mailasin no sino dagiti reaksyonaryo a kabusor ken sino met dagiti progresibo a mabalin a makagayyem ti umili.

Rebolusyonaryo a Taktika

Numan pay saan a mamati ti rebolusyonaryo a tignayan a magun-od ti pudpudno a panagbaliw iti kagimongan babaen iti burges nga eleksyon, ti eleksyon ket mabalin a gundawayan ti umili ken rebolusyonaryo a tignayan tapno maiwaragawag dagiti rebolusyonaryo a panawagan ken kiddaw ti umili, maki-alyado kadagiti silulukat a tumulong iti rebolusyon, mangipangabak kadagiti makatao ken progresibo a kandidato, pakaruen dagiti bettak iti intar dagiti reaksyonaryo, ken isina dagiti kapepeklan a reaksyonaryo. Daytoy ti husto a taktika ti nagkaykaysa a prente tayo iti umay nga eleksyon.

Iggeman tayo daytoy tapno makaani tayo ti adu ken nadumaduma a balligi para iti umili ken rebolusyon iti umay nga eleksyon. Iti kastoy a wagas, in-inut a pumigpigsa tayo, ken in-inut met a kumapkapsut ti kabusor. 